

თამაში მიჰყავს ვეტერანს

თბილისი. "დინამოს" სტადიონი. 13 სექტემბერი.

"დინამო" (თბილისი) – "ლევსკი" (სოფია, ბულგარეთი) – 1:0 (1:0).

"ლევსკი": დერვენტსკი; ვასილევსკი, ფილიპოვი, დონჩევი (სტოიაროვი); არსოვი, გეორგიევი; პევევი (გაიდაროვი), სოკოლოვი, იორდანოვი, ილიევი, კოსტოვი.

"დინამო": კვაჭაძე, ჩოხელი, თორაძე, ხოჭოლავა; კოტრიკაძე, ზეინკლიშვილი, მელაშვილი, ბარქაია, ჟორდანიას, ლოლობერიძე, დათუნაშვილი (გაგნიძე).

მსაჯი: ტ. ბახრამოვი (ბაქო).

ჩვენს წინაშეა "ლევსკის" შემადგენლობა, რომელმაც ბულგარეთის პირველობაზე მესამე ტურში მოუგო "სპარტაკს" (ვარნა) ანგარიშით 2:0. ამ შემადგენლობიდან თბილისში თამაშობდნენ ყველანი, გარდა აბაჯიევისა (№7), რომელიც თავისი ქვეყნის ოლიმპიურ ნაკრებში იყო ამ დღეს დაკავებული.

ეს მცირე ექსკურსი დაგვჭირდა იმის აღსანიშნავად, რომ 13 სექტემბრის მატჩში ჩვენი სტუმრების დანაკლისი მინიმუმს არ აღემატებოდა, ხოლო დინამოელებს აკლდათ ისეთი წამყვანი მოთამაშეები, როგორც ს. კოტრიკაძე, გავაზაშვილი, იამანიძე, კალოევი, მესხი. ასეთ ვითარებაში მეტად ძნელი იყო მატჩის ჩატარება საუკეთესო ფორმაში მყოფ გუნდთან, რომელიც ამჟამად პირველ ადგილზეა ბულგარეთის საფეხბურთო ჩემპიონატში.

ბულგარელებმა კარგად იცოდნენ თავიანთი ეს უპირატესობა და მინდორზე გამოვიდნენ თავიანთ ძალებში ღრმად დარწმუნებულნი. თამაშის დაწყების წინ გუნდის მწვრთნელმა ხ. მლადენოვმა განაცხადა: დღეს ჩვენი გუნდის წინაშე დგას №1 ამოცანა - როგორმე შევძლოთ ა.ლოლობერიძის ნეიტრალიზება. თუ ეს პრობლემა შევასრულეთ, ვფიქრობ, საქმე კარგად უნდა წავიდეს.

და მართლაც, ბულგარელები ყოველმხრივ ცდილობდნენ გამოეთიშათ თამაშიდან დინამოელთა კაპიტანი. ზოგჯერ საამისოდ საჭირო ხდებოდა დამატებითი ძალების გადაყვანა დაცვის მარჯვენა ფრთაზე უკან დაწეული შუამარბის ან მეორე ნახევარმცველის საშუალებით, მაგრამ მწვრთნელის მიერ დასახული "პრობლემა №1" შეუსრულებელი დარჩა. ლოლობერიძემ ამ დღეს ნამდვილი ახალგაზრდული ენერჯით და მონდომებით ითამაშა. ვეტერანმა თავიდანვე იკისრა გუნდის მორგანიზებლისა და ლიდერის როლი და შესანიშნავად შეასრულა კიდევ იგი როგორც ინდივიდუალურ ბრძოლაში, ისე საერთო კოლექტიური ოპერაციების წარმოებისას.

საუკეთესოდ ჩაატარა მატჩი "დინამოს" დაცვამ და ნახევარდაცვამ. "ლევსკის" ფორვარდები ფიზიკურად კარგად მომზადებული, მაღალტექნიკური, სწრაფი ფეხბურთელებია, რომლებიც განუწყვეტლივ მოძრაობენ, უაღრესად ზუსტი გადაცემები აქვთ და მუდამ ცდილობენ უმნიშვნელო, მეორეხარისხოვანი მდგომარეობიდან შექმნან ნამდვილი შეტევა და კარის აღების რეალური შესაძლებლობა. საჭირო იყო უკიდურესი ყურადღების გამოჩენა, მაქსიმალური დამაბულობით თამაში იორდანოვის, პევევის, სოკოლოვის იერიშების უვნებელსაყოფად და დინამოელთა უკანა ხაზების მოთამაშეებმა ყველაფერი გააკეთეს კარის უზიფათობისათვის.

ტერიტორიული უპირატესობა თამაშის მსვლელობაში ძირითადად თბილისელთა მხარეს იყო. ეს განსაკუთრებით ხელშესახები იყო მინდვრის შუაგულში, მაგრამ საჯარიმო მოედანთან მიახლოებისას "დინამოს" თავდასხმა

გამლიერებული დაცვის შეუპოვარ წინააღმდეგობას აწყდებოდა, რის გამოც საერთო უპირატესობის რეალიზაცია მეტად ძალზე გაძნელდა, ამასთან, დინამოელები ერთობ პასიურად იბრძოდნენ მაღალი ბურთებისათვის და მოწინააღმდეგეებს სისტემატურად უთმობდნენ ფლანგურ გადაცემებს.

90 წუთის განმავლობაში გატანილ იქნა ერთადერთი ბურთი. ეს იყო სწრაფი, ლამაზი კომბინაცია: ჟორდანია-მელაშვილი-ლოლობერიძე-ჟორდანია. ლოლობერიძეს შეეძლო თვითონ დაერტყა კარში, მაგრამ უკეთეს პოზიციაში შენიშნა ჟორდანია და გადასცა მას ბურთი, რომელიც ამ უკანასკნელმა ზუსტი დარტყმით გაგზავნა კარში - 1:0. ამ გოლმა გამარჯვება მოუტანა თბილისის "დინამოს".

რ. ქორიძე

?? სექტემბერი, 1959 წ.